



***ABESTI  
BILDUMA***



### **ALA KINKIRI, ALA KUNKURU**

Erran dut, erranen eta errango,  
ez naiz isilik egongo,  
plaza hortako dama gazteak  
ez dira moja sartuko.

Ala kinkiri, ala kunkuru,  
ala kinkiri kunkuru kanta,  
ala kinkiri kunkuru kanta  
gu bezalakoak dira,  
hola!

Erran dut, erranen eta errango,  
ez naiz isilik egongo,  
plaza hortako gizon gazteak  
ez dira fraile sartuko.

Ala kinkiri, ala kunkuru,  
ala kinkiri kunkuru kanta,  
ala kinkiri kunkuru kanta  
gu bezalakoak dira,  
hola!

Erran dut, erranen eta errango,  
ez naiz isilik egongo,  
plaza hortako gazte guztiak  
ezkontzan dira sartuko.

Ala kinkiri, ala kunkuru,  
ala kinkiri kunkuru kanta,  
ala kinkiri kunkuru kanta  
gu bezalakoak dira,  
hola!

### **ALDAPEKO**

Aldapeko sagarraren  
adarraren puntan  
puntaren puntan  
txoria zegoen kantari.

Xiru-liruli, xiru-liruri,  
nork dantzatuko ote du  
soinutxo hori?

Zubiburu zelaieko  
oihanaren zolan,  
zolaren zolan,  
lili bat bada beilari.  
Xiru-liruli, xiru-liruri,  
nork bilduko ote du  
lili xarmant hori?

Mende huntan jasan dudan  
bihotzeko pena,  
penaren pena,  
nola behar dut ekarri?  
Xiru-liruli, xiru-liruri,  
zuk maitea hartzazu ene pena hori!

### **BEHIN BATEAN LOIOLAN**

Behin batean Loiolan erromeria zan,  
hantxen ikusi nuen neskatxa bat plazan;  
txoria baino ere arinago dantzan;  
huraxe bai polita, han politik bazan!

Esan nion desio senti nuen gisan,  
harekin hizketa bat nahi nuela izan;  
erantzun zidan ezik atsegin har nezan,  
aditu zidala zer nahi nion esan.

Arkitu ginanian inor gabe jiran,  
koloriak gorrituarazi zizkidan;  
kontatuko dizuet guztia segidan,  
zer esan nion eta nola erantzun zidan.

"Dama polita zera, polita guztiz, ai!  
baina halare zaude oraindik ezkongai,  
ezkon gaitezen biok! esan zaidazu bai!"  
"Ni zurekin ezkondu? ni zurekin? jai jai!"

### **GURE AITAK AMARI**

Gure aitak amari  
gona gorria ekarri;  
berriz ere maiteko dio  
gure amak aitari.  
Gure aitak amari  
gona gorria ekarri.

Gona gorri gorria  
zazpi jostunek josia;  
berriz ere maiteko dio  
gure amak aitari.  
Gure aitak amari  
gona gorria ekarri.

Gure amak aitari  
fraka berriak ekarri;  
berriz ere maiteko dio  
gure aitak amari.  
Gure amak aitari  
fraka berriak ekarri.



Fraka berri berriak  
zazpi jostunek josiak;  
berriz ere maiteko dio

gure aitak amari.  
Gure amak aitari  
fraka berriak ekarri.

### **NERE SENTIMENDUA**

Nere sentimendua nahi det deklaratu:  
Ameriketan nago hau ezin ukatu; (Bis)  
hemen eginagatik ondo gobernatu,  
horkuaz egiten naiz asko akordatu.

Honuntz etorri nintzan utzirikan ama,  
anai-arrebak eta familia dana; (Bis)  
egitiagatikan desio nuena,  
geroztik triste nago,ai! nere barrena.

Hamazazpi urtetan banuen segira:  
neska gazte guztiak neroni begira; (Bis)  
lurrik ikuttu gabe, gorputzari jira,  
orduko arintasunak asentatu dira.

Gorputz ederra nuen, dantzari arina,  
bainan ez da izaten betiko egina; (Bis)  
orain eginagatik hemen ahalegina,  
ez gera libertitzen orduan adina.

Horko bizimoduaz oso aspertuak,  
onarako ziraden gure desiuak; (Bis)  
orain etxera berriz emanik pausuak  
Hemen bizi gerade erdi-mudatuak.

Despedida dijua sei bertso hoiekin,  
anaia konformatu horrenbesterekin; (Bis)  
nere gustua hau da, nahi badezu jakin:  
beste horrenbeste jarri, aio Joxe Juakin.  
(Bis)

### **PELLO JOXEPE**

Pello Joxepe tabernan dala  
haurra jaio da Larraulen  
etxera joan da esan omen du:  
-Ez da neria izanen,  
beraren amak topa dezala  
haur horrek aita zein duen.

Hau pena eta pesadunbria!

Senarrak haurra ukatu  
Pello Joxepe bihotz neria  
haur horrek aita zu zaitu  
haur horrentzako beste jaberik  
ezin nezake topatu.

Zure semia besuan daukat  
senarra aldamenian  
orain denborik eztaukat eta  
zuazkit ordu onian  
neronek abisatuko dizut  
garaia datorrenian.

### **SALAMANKARA**

Gazte gaztetik aitak ta amak  
fraile ninduten nonbratu  
bai eta ere estudiora  
Salamankara bidaldu.  
Salamankara nindoalarik  
bidean nuen pentsatu  
estudiante tunante baino  
hobe nuela ezkondu.

Ostatu xume polit batean  
gosez gelditu bainintzen  
neska xarmant bat ari zitzaidan  
mahainean zerbitzatzen.  
Begia kartsu, ezpaina lore,  
enekin aise mintzatzen  
aingeru hori ordu berean  
ene bihotz barnean zen.

Hitz erdi batez maite nuela  
erran nion belarrira  
baina, gaixoa, herabetua  
ihes joan zen kanpora.  
Ez ahal nauzu, izar ederra,  
kondenatzen infernura!  
Ez da sekulan ene gogotik  
histuko zure itxura.

Aita Jainkoak egin banindu  
zeruetako giltzari  
orduntxe bai jakinen nuen  
atea nori ireki.  
Lehenengo aitari, gero amari,  
gero anai-arrebari,  
ta azken orduan isil-isilik  
nire maite politari.



### **BATZUETAN JARTZEN NAIZ**

Batzuetan jartzen naiz  
etxetik begira  
begiak jausten zaizkit  
leihotik behera  
lurrean salto eginez  
kanikak bailira  
gaua etorri arte  
dibertitzen dira.

Ikusmira galduta  
asper naizenean  
gogo ipintzen dut  
etorkizunean  
zer egin behar dudan  
euskaldun artean  
suizidatzen ez banaiz  
datorren urtean.

Estraineko gauza  
zeharo alpertu  
jatearekin soilik  
nor da gaur kontentu?  
asmatu behar ditut  
makina bat santu  
egutegia festaz  
erabat gorritu.

Lagunekin paratu  
txokolate jatiak  
zaku karrerak eta  
bidaia haundiak  
ezagutu nahi ditut  
enpatxu eztiak  
Constantinopla eta  
Parisko zubiak.

Apaizeri sotanak  
dizkiet kenduko  
itsasontzi piraten  
banderak jeikiko  
tiobibo batetan  
denok gara igoko  
zintzoak garelako  
ez dugu ordainduko.

Musika joko dugu  
alde guzietan  
batek bonbuan eta  
besteak tronpetan  
bilutsirik bainatu  
ilargi argitan  
maitea bilatuko  
dugu ur azpitan.

### **DIOS TE SALBE**

Dios te salbe, Abe Maria,  
Jainkoak gabon diela,  
endredatzera etorri gera  
lotxo gozuan daudela.

Garai honetan festa handiak  
ospatzen dira Lurrean  
Gabonak eta Eguberriak  
dauzkagu gure aurrean.

Hori delako kalean zehar  
ibiltzen gara kantari  
itxaropena eskeini asmoz  
Euskal Herri guztiari.

Pipa hortzetan hartua dator  
gure lagun Olentzero  
opari asko ekartzen ditu  
ongi portatu ezkerero.

Denbora ere aurrera doa  
zainduaz bere neurria  
Urte Zaharrak Agur esanda  
badator Urte Berria.

### **GIZON ARRUNTAREN KOPLAK**

Kantatzera noazu bertso bat edo bi  
herenegun jarriak gizon arruntari  
Antonio Lorentxo edo Joxemari.  
Gauza ederra denik ez ukatu neri,  
gauza ederra denik ez ukatu neri.

Goizian jeikitzean lehenbiziko gauza  
aba zabaldu eta jazten ditut galtzak  
muturra garbitzeko nolako zalantzak.  
Ezin kendurik nabil luaren urratsak,  
ezin kendurik nabil luaren urratsak.

Kafesnia hartuta horrekin batera  
ahal baldin badet behintzat noa komunera  
aurrian papera ta atzian papera.  
Periodikua letuz ilustratzen gera,  
periodikua letuz ilustratzen gera.

Etxetikan lanera noa nahiko mantso  
Realak kuartro uno galdu zuen atzo  
kalean bi zakur ta beste hiru atso.  
Egun don Pepito eta don Alfontso,  
egun on don Pepito eta don Alfontso

Gauzak gaizki dabilta hau da komeria  
Afganistanen gerra piztu zuten ia



tokatzen baldin bazait aurten loteria  
erosi beharko det Zitroen berria.  
Ongi egon omen zen Tolosan peria.

Ongi ikasi nuen gaztetan baltsian  
karterari kontutzen txamarra galtzian  
Artxandako aiziak beruak baitzian.  
Ederki egoten zen ohiaren atzian  
ederki egoten zen ohiaren atzian.

Ni lana egina naiz semiak hazteko  
haiek eskola ona xuxen ikasteko  
ikasi eta gero lanian hasteko.  
Ez ditezela izan bazterrak nahasteko,  
ez ditezela izan bazterrak nahasteko.

Semeen semeetatik baitatoz semiak  
batzuek arrak eta bestiak emiak  
batzuek loriak eta beste batzuk miak.  
Horrela jarri zuen Jaunaren legiak,  
horrela jarri zuen Jaunaren legiak.

Gaurko eguna ere bota degu bada  
gizon okupatua gauza ederra da  
asko gustatzen zait oiluaren salda.  
Mugairen hasten baita Belateko malda,  
Mugairen hasten baita Belateko malda.

Ez naiz ni gizon txarra, baina zer arraio  
Fidel Kastro izateko ez bainintzan jaio  
musian egiten det makina bat saio  
andriaren onduan afaldu det iaio.  
Orain ohera nua bihar arte ayo!,  
orain ohera nua bihar arte ayo!

### **AGUR ZUBEROA**

Agur Zuberoa  
bazter guztietako txokorik ederrena  
Agur Atharratze  
zurekin ditut nere ametsik goxoenak  
bihotzaren erditik  
bortzetan jalki ditarazut asperena,  
zu utziz geroztik  
bizi naiz tristerik,  
abandonaturik  
ez baita herririk,  
Paris ez besterik  
zu bezelakorik.

Sorlekua utzirik  
gazte nintzelarik  
Parisera joan nintzen  
kuriaz beterik  
plazerez gose eta  
buruan harturik  
behar nuela alegera bizi  
bortzetan geroztik negar egiten dut  
Zuberoagatik  
bortzetan geroztik negar egiten dut  
Zuberoagatik

### **XALBADORREN HERIOTZEAN**

Adiskide bat bazen  
orotan bihozbera  
poesiaren hegoek  
sentimentuzko bertsoek  
antzaldatzen zutena.

Plazetako kantari  
bakardadez josia  
hitzen lihoa iruten  
bere barnean irauten  
oinazez ikasia, ikasia.

### **NON HAGO ZER LARRETAN UREPELEKO ARTZAINA, MENDI-HEGALETAN GORA OROITZAPEN DEN GERORA IHESETAN JOAN HINTZENA (BIS)**

Hesia urraturik  
libratu huen kanta,  
lotura guztietatik  
gorputzaren mugetatik  
aske sentitu nahirik.

Azken hatsa huela  
bertsorik sakonena,  
nehoiz esan ezin diren  
estalitako egien  
oihurik bortitzena, bortitzena.



## LORIAK UDAN IHINTZA BEZELA

Loriak udan ihintza bezala,  
maite det dama gazte bat,  
hari hainbeste nahi diotanik  
ez da munduan beste bat;  
inoiz edo behin pasatzen badet  
ikusi gabe aste bat,  
bihotz guztira banatutzen zait  
halako gauza triste bat.

Neskatxa gazte paregabia,  
Apirileko arrosa,  
izarra bezin dizdizaria,  
txoria bezin airosa;  
oraintxe baino gusto gehiago  
nik ezin nezake goza:  
zorionian ikusten zaitut,  
nere bihotzak hau poza!

Ez al didazu antzik ematen  
nik zaitudala nahiago,  
ai, mariñelak gau ilunian  
izarra baino gehiago?  
Nere onduan zauzkadalako  
pozez zoraturik nago;  
zu ikustiak alegratu nau,  
triste neguen lehenago.

Nik hainbat inork nahi dizunikan  
arren ez zazula uste,  
nere begiek beren aurrian  
beti desio zaituzte;  
eguzkirikan ikusi gabe  
txoria egoten da triste,  
ni ez nau ezerk alegratuzten  
zu ikustiak hainbeste.

## HORMATXORIAK (Anttoni, Anttoni)

### Anttonek:

Anttoni, Anttoni  
zure atean nago ni

### Anttonek:

Hormatxoriak negu gorrian  
ez du atsegin elurra  
zerua goibel, kabia hotza  
ta janari gabe lurra  
ai, maite, nere bihotzak duan  
zure hotzaren bildurra  
biontzat kabi bat berotzeko  
bilduko nuke egurra.

Aurpegi fina, gorputza berriz  
ez dago zer esanikan,  
hizketan ere grazi ederra  
ezer ez dezu txarrikan;  
mundu guztia miratuta're  
zu bezelako damikan  
agian izan liteke baino  
ez det sinisten danikan.

Nere betiko pentsamendua  
nere kontsolagarria,  
zu gabetanik ezin bizi naiz,  
esaten dizut egia;  
zu baziñake arbola eta  
ni baldin banintz txoria,  
nik zu zinaken arbol hartantxen  
egingo nuke kabia

Amoriuak nere bihotza  
zureganuntza darama,  
herri guztian zeren daukazun  
neskatx bikainaren fama;  
beste fortunik mundu honetan  
ez det desiatzen, dama:  
haur batek berak izan gaitzala  
ni aita eta zu ama.

Falta duenak logratutzeko  
hitz egitia txit on du,  
eta nik ere saiatu biat  
ote gintezken konpondu;  
gaur nagon bezin atrebitua  
sekulan ez naiz egondu,  
hargatik golpez galdetzen dizut  
nerekin nahi'zun ezkondu.

### Anttonik:

ai, Antton ai Antton  
ate ondoan hor konpon

### Anttonik:

Enarak ez du behin egindako  
kabrik inoiz aldatzen  
urtero beti kabi haretan  
umeak ditu bazkatzen  
baina, zu, Antton, enara txarra  
zaitut neretzat bilatzen  
jai bakoitzean neska berria  
ikusten zaitut maitatzen.



Enarak ere bere kabia  
galduta badu ikusten  
biderik gabe haruntz ta honuntz  
kabitik du aldegiten  
egarri dagon nere bihotza  
zuk eman ezik edaten  
berriro ere ibiliko da  
gogorik gabe nunbaiten.

Zure bihotza egarri dela  
esan didazu bertsotan  
neronek ere ikasia dut  
arrazoi dezula hortan  
zu beti zabiltz edari bila,  
ikusi zaitut askotan  
baina, neurritz gain egarri hori  
itotzen dezu ardotan.

### **AI GURE AINTZINAKO**

Ai, gure aintzinako  
guraso nobliak  
zituzten legiak,  
guk hainbat trabaju ta  
fetxarik gabiak!  
Adelantua dala  
uste du jendiak  
jarri dituztelako  
trena ta tranbiak;  
ondoren datozenak  
ez dira hobiak.

Ez det nahi gizasemei  
ezkongai ta ezkondu,  
ez eman ta ez kendu;  
dan gauza aitortzeak  
lotsa ematen du:  
aitak eta amak jantzi,  
etxean mantendu;  
askok irabazia  
eskas izaten du;  
probatutzen duenak  
hala esaten du.

Orain ehun urteko  
zenbat gizon abil  
ez baziraden hil,  
bat txoratu liteke  
munduan balebil;  
hemengo tren ta tranbi  
eta automobil,  
hitza berriz noranahi  
alanbrean dabil...  
Lehengo bidez gezurra  
besterik ez dabil.

Baita neskatxak ere  
ezkongai zauztenak,  
asko edo gehienak;  
batez ere kalean  
serbitzen daudenak:  
ileak harro jarri  
motzak berriz gonak;  
hioen txorakeriak  
ez dirade onak;  
hoiek ikusten zetik  
begira dagonak.

Tren ta tranbi-bideak  
ikusteko hemen  
zaleturik geuden;  
izan ere, halako  
jornalak al zeuden!  
Hiru edo lau pezeta  
irabazi arren,  
bizioz bete gera,  
zorrak berriz gailen;  
askotan gastatzen da  
kobratu baino lehen.

Eta gainera hioen  
jantzi sobranteak  
dira txokanteak:  
espaldetako boltsak,  
kuello mudanteak,  
txanbra eta abrigua,  
gonak bolanteak,  
zapata koskorduna,  
botoi brillanteak,  
buruan mantila ta  
eskutan guanteak.



## NERE ANDREARI

Frantses euskaldun bat etorri zait  
ipinitzeko bertsuak,  
deklaratuaz haren etxian  
gertatu diran kasuak;  
danak ez dira errazak baina  
esango ditut batzuek,  
argitasuna ematen badit  
gure Jaun amorosuek.

Txurrerua're lan sentzilua  
da asko irabazteko,  
horrek behinipin ez du egiten  
mantendu eta jazteko;  
andriarekin alkar hartuta  
ni modu hontan uzteko,  
bi kristau gaizto nahikuek dira  
baztar guztiak nahasteko?

Nere barrengo sentimentuek  
nahi ditut adierazi,  
zer estadutan gelditu naizen  
inork nahi badu ikasi;  
izarra baino ederragoko  
andria joan zait ihesi,  
orain bi urte aldegin zidan,  
geroztik ez det ikusi.

Ni emaztiak utzi ninduen  
estadu triste batian,  
beste batekin aldegin zidan  
hanbat beretzat kaltian;  
txurruak janaz ederki dabil  
diruak aitu artian,  
zer esan behar ote dit neri  
Josafatara juatian?

Hogeita hamar urte dauzkat nik  
oraindik franko gaztia,  
eta andriak bi gutxiago,  
hau bizimodu tristia!  
Hark neri egin dizkidan gauzak  
esatekuak ez di(r)a,  
txurrero batek engainatuta  
eraman dit emaztia.

Ez det milagro edukitzea  
malkoz beteta muxuak,  
kabi ta guzi ihes egin dit  
tamain hortako uxuak;  
nik berriz inon ikusten badet  
adituko du gaxuak:  
Non ote dira garai bateko  
gure hizketa goxuak?

Behar bezela funtzionatzen  
ez dago errez fabrika,  
lau urte pasa alkarrekin da  
ez degu izan haurrika;  
ahalegin egin faltan ez daukat  
kontzientzia zorrika,  
orain Parisen txurruak saltzen  
han omen dabil korrika.

Txurreru hori zer gizona dan  
sinistu entzun deguna:  
lana egiteko gogua falta  
eta mingaina leguna;  
bedeinkatua izan dedila  
aldegin zuten eguna,  
gizarajuak harrapatu du  
bere moduko laguna.



## XARMANGARRIA ZARA

Xarmangarria zara,  
eder eta gazte;  
ene bihotzak ez du  
zu baizikan maite.  
Beste zenbait bezala,  
ote zara libre?  
Zurekin ezkontzeaz  
dudarik ez nuke.

Oi maitea, zatozkit  
plazer duzunean,  
inork ikusi gabe  
ilunabarrean;  
lagun bat badukezu  
joateko bidean,  
hark ezarriren zaitu  
trankil bihotzean.

Adios beraz orain,  
ene arraroa,  
hori dela medio  
herritik banoa;  
bihotza triste eta  
petxuan gogoa,  
beti jarraikiren zait  
zure amodioa.

Txuri-gorria zara  
arrosa bezala,  
profetak ez dirade...  
mintzo hola hola.  
Araberan bazenu  
gorputza horrela,  
iduriko zenuke  
zeruko izarra.

Plazer eginen duzu  
isiltzen bazira,  
haur inorantak hola  
tronpatzen bait dira.  
Ez da enetzat ina  
holako segida,  
bestalde zure baitan  
ez naiteke fida!

## TRISTE BIZI NAIZ ETA

Triste bizi naiz eta  
hilko banitz hobe,  
badauzkat bihotzian  
zenbait atsekabe:  
dama bat maitatzen det  
baiñan haren jabe  
sekulan izateko  
esperantza gabe.

Amorez eritua  
zenbait denbora hontan,  
gaurik ez det pasatzen  
soseguzko lotan:  
penaren kargarekin  
urtuta, frankotan  
kanpora irteten zait  
bihotza malkotan!

Ezin bizi zu gabe,  
hau amoriuia!  
Logratzen ez bazaitut,  
zer martiriuia!  
Ez badezu desio  
nere eriuia,  
zuregan arkitzen da  
erremediua.

Nere bihotz gaixua  
penatua dago,  
ezin egon liteke  
ai!, penatuago;  
pasatzen ditudala  
aspaldian nago  
egunak triste eta  
gauak tristiago.

Zein ote dan eziñik  
kontura erori,  
kutizia jaioko  
zaiote askori;  
nik ordian ez diot  
esango iñori,  
berak badaki eta  
bastante det hori.

Erregututzen dizut,  
o Jesusen Ama  
nitaz kupi dedilla  
maite detan dama;  
bihurtzen badidazu  
bihotzera kalma,  
kantaz banatuko det  
milagruen fama.



## **JOANA BIXENTA OLABE**

### **1.- J. Bixentak:**

Nagusi jauna, hauxen da lana,  
amak bidaltzen nau berorregana

### **Nagusi Jaunak:**

Ai, bidalduko bazinduke maiz!  
zu ikusita konsolatzen naiz.  
Sinista zazu:  
oso zoraturikan naukazu!  
Horren polita nola zera zu?

### **2.- J. Bixentak:**

Amak esan dit, etxeko errenta  
pagatzeko dirurik ez zuen ta,  
ia egingo dion mesere,  
hilabetian gehienaz ere,  
itxoitia;  
bada zierto dala ematia  
pasa baino lehen hilabetia.

### **3.- Nagusi Jaunak:**

Logratutzia, errex halare,  
nahiz hori ta beste zernahi gau za're  
seguru dala esan amari,  
zu baldin bazatoz mandatari:  
dudarik gabe,  
nere borondatiaren jabe  
zu zera, Joana Bixenta Olabe.

### **4.- J. Bixentak:**

Beraz bertatik noa etxera  
poz haundi bat amari ematera;  
orain adio, nagusi jauna,  
presaka jua biat amagana.

### **Nagusi Jaunak:**

Ez zuazela:  
portatu zait nik nahi bezela,  
gaur etxera jua ez zaitzela.

### **9.- J. Bixentak:**

Jauna, berrorrek, baina alferrik,  
badaki armatzen lazo ederrik;  
lazua ehiz bage gera dedin,  
nere etxian nahi ditut egin  
afaldu ta lo;  
nahiago ditut hango bi talo,  
ta ez hemengo mila erregalo.

### **10.- Nagusi Jaunak:**

Bihotz nereko dama polita,  
asmoz muda zaitte, hauxen tori ta:  
hamasei duroko urre fina,  
sendatu nahi zazun nere mina.

### **5.- Nagusi Jaunak:**

Zuen etxia dago urruti,  
bidian zer gerta izan beldurti;  
bada ia pasa da eguna,  
arratsa berriz dator iluna;  
orain juatia  
txartzat eduki, nere maitia;  
gaur hemen bertan gera zaitia.

### **6.- Nagusi Jaunak:**

Ez jua etxera, bide hoietan,  
gauaz, bakarrik eta ilunbetan;  
kontura erori zaitia zu:  
gauaz ilunbian jua biazu  
peligro haundiz,  
eta hobe dezu ehun aldiz  
bihar goizian jua egun argiz.

### **7.- J. Bixentak:**

Ezetz etsia egon liteke,  
ni hemen gelditu ezin niteke;  
amak espero nau gauerako,  
eta hark espero nauelako,  
jua behar det nik;  
alaba ikusi gabetanik  
amak izango ez luke onik.

### **8.- Nagusi Jaunak:**

Hemen zuretzat dira parako  
jaki txit goxuak afaitarako;  
eraria berriz -Jaungoikua!-,  
hilak piztutzeko modukua:  
ardo ondua,  
ontzen urtietan egondua,  
Malagatikan da bidaldua.

### **13.- J. Bixentak:**

Barkaziua du ta eskatu,  
nere bihotz onak ezin ukatu:  
erakutsi ditalako, jauna,  
gaitz eginaren damutasuna,  
konforme nago:  
ez egin ta ofensa gehiago,  
gaurkua oso ahaztutzat dago.

### **14.- Nagusi Jaunak:**

Berriz nik egin zuri ofensa?  
Arren horlakorik ez bada pentsa  
Zaukazkit neskatxa fin batetzat  
eta gusto haundiz emaztetzat



**J. Bixentak:**

Ez, jauna, ez, ez!  
Merezi bezin kopeta beltzez,  
esango diot ezetz eta ezetz!

**11.- Nagusi Jaunak:**

Gainera, berriz, Juana Bixenta,  
utziko dizuet etxeko errenta:  
kito zor didazuen guzia,  
kunplitzen banazu kutizia.

**J. Bixentak:**

Lotsa gogorra!  
Sufritzen dago gaur nere onra,  
penaz malkuak darizkit, horra!

**12.- Nagusi Jaunak:**

Nik ditut kulpak, ez egin negar,  
horlakorik ez nizun esan behar;  
animan sentitutzen det mina  
zuri ofensa hori egina.  
Maldiziu!  
Ez dakit nun neukan juiziu,  
eskatzen dizut barkaziua!

**17.- Morroiak:**

Aingeru hari lagundu eta  
horra jauna, egin ostera buelta;  
bidian, bai, bildurtxo zan bera,  
bainan ailegatuta etxera  
kontentu zegon;  
orain kezketan ez du zer egon;  
oihera joan eta pasatu gau on.

**19.- Morroiak:**

Handik zortzi bat egunetara,  
edo hamar ziran ez dakit bada;  
ez, hamar ezin zitezken izan,  
handik zortzi egunera elizan  
ezkondu ziran;  
ezkondu ta etxera segiran,  
jendia franko bazuten jiran.

**21.- Morroiak:**

Dama gaztiak, ez egon lotan,  
begira zaitezte ispilu hontan:  
gustatuta birtute ederra,  
andretzat hartu bere maizterra  
du nagusiak;  
horla irabaztera graziak  
saia zaitezte beste guziak.

hartuko zaitut;  
bihotzetikan esaten dizut  
zuretzat ona baderizkizut.

**15.- J. Bixentak:**

Hori egiaz baldin badio,  
neregana egon liteke fio;  
bainan usatuaz kortesia,  
ama neriarri lizentzia  
eska bezaio.

**Nagusi Jaunak:**

Hori gustora egingo zaio,  
bihar goizean juango natzaio.

**16.- J. Bixentak:**

Banua orain,

**Nagusi Jaunak:**

Atoz honuntza  
biderako hartu zazu laguntza.  
Adi zazu, morroi Joxe Juakin:  
etxera farola argiakin  
aingeru honi  
gaur zuk laguntzia da komeni,  
kezketan egon ez nadien ni.

**18.- Morroiak:**

Heldu zanian hurrengo goiza,  
nagusiak zuen kunplitu hitza:  
joan zitzaion amari etxera;  
andretzat alaba eskatzera  
amak txit firme  
hartu ta gero mila informe,  
gelditu ziran biak konforme.

**20.- Morroiak:**

Bost hilabete edo sei hontan  
ez dirade beti egon lotan:  
eman dute zenbait jira-bira  
eta gozatutzen bizi dira  
dixak ausarki;  
hobeto ezin liteke arki,  
espero dute haurtxo bat aurki.

**BILINTX**



## BETROIARENAK

Bertso berriak jartzen  
orain naiz abian,  
predikatzera nua,  
Euskalerrian:  
betroi bat hartu nuen  
Hernanin ferian,  
ganantzia egingo  
zuela agian;  
tristura begian,  
beti aulerian,  
ez haren premian  
nere familian;  
Xenpelarrek dakizki  
Erreterian.

Ostegun joan darian  
hamabost Hernanin  
betroiaren tratua  
genduen egin;  
Inazio saltzaile,  
erostuna Fermin,  
hemeretzi ezkutu  
genion eragin:  
sabelian du min,  
inork ase ezin,  
artuari muzin,  
ez du nahi edozein ...  
atzetik bihar ditu  
zazpi medezin.

Informe txarrak dira  
horrentzat auzotik:  
espalda ateria  
urgun besotik;  
eztula ta antsia  
ukuilu zokotik,  
desterratuko nuke  
nik nere bototik;  
amarra lepotik,  
grilluak orpotik,  
makilaz ondotik  
jotzen det gogotik ...  
etzaio ajolarik  
ezerengatik.

Oraindik gaztia da,  
hogeitasei urte;  
emari omen ditu  
bost hilabete;  
nik eztiot igertzen,  
hala esan dute,  
gezurra baldin bada  
engainatu naute;  
haragia aparte,  
hezurretan torpe,  
zainak dauzka fuerte,  
zeinek nahi du merke?  
Zikiro baten truke  
salduko nuke.

Kara iguala du  
aurrian ta atzian,  
basurdia dirudi  
zutik jartzian;  
konsuelo bat daukat  
nere bihotzian:  
bizirikan gelditzen  
bada Ilbeltzian,  
hori umatzian,  
esnia etxian,  
gazta abatsian,  
gazura arratsian  
belarrak gizenduko  
du Maiatzian.

Horren arboletikan  
datorren loria,  
frutua konserbatzen  
pare gabia;  
umatzen baldin bada  
ai zer poderia!  
guardatuko diot  
bere ohoria;  
horren koloria  
beltza ta moria,  
juan zaio floria,  
lehenago hobia:  
nere fameliaren  
hondadoria.



## KANTORE BERRI XARMANT BATZUEK

Kantore berri xarmant batzuek  
hastera noa kantatzen  
inorant denik baldin badago  
guztiek jakin dezaten  
guztiek badakizue badela  
izar eder bat Luzaiden  
eztitasunez betea da ta  
guztiak ditu xarmantzen.

Denok berdinak ez garelako  
joera diferenteak,  
ditugu eta hartatik datoz  
nahigabearen nekeak.  
Lan arazoak, etxeko kezka,  
kanpoko lagunarteak ...  
sufrientua berekin dakar  
elkar maite izateak.

Udaberriak nola dakartzan  
ondorio aberatsak,  
amodioak ernetzen ditu  
bihotzetan esperantzak,  
sarri mementu goxoak eta  
tarteka une garratzak,  
horiek dira maitasunaren  
loreak eta arantzak

Maitemintzea polit izanik  
bere iraupen gozoa,  
azkenerako bihur daiteke  
bientzako arazoa.  
Nahiz ta askotan ilusioa  
bilakatu frakasoia,  
sentimentuek merezi dute  
gure sinismen osoa.

## AITORREN HIZKUNTZ ZAHARRA

Aitorren hizkuntz zaharra  
nahi dugu zabaldu,  
munduaren aurrean  
gizonki azaldu.  
Baldin gure zainetan  
odolik badugu,  
euskaldunok euskaraz  
hitz egin behar dugu.

Euskara galdutzeko  
ez dago beldurrik;  
munduan ez da sortu  
hortako indarrik.  
Sasijakintsu asko  
dabiltz galdu nahirik ...  
Asmo txar horiek guztiak  
dirade alferrik!

Etsaiak aurka dabiltz  
euskararengatik;  
lehen, orain eta beti,  
guztiz aspalditik;  
lurperatu nahirikan  
antzina-antzinatik...  
Ez dute hori lortuko  
inongo aldetik!

Gora euskara gurea  
zoragarriena,  
euskaldunen artean  
maitagarriena.  
Munduan sortu zenik  
hizkuntzik zaharrena,  
Gora ta gora euskaldunak  
eta gure euskera. (bir)

Zein hizkuntza ederra  
euskara guria  
inon ez dut aurkitzen  
beste bat hobia.  
Usain gozodun hizkuntz  
txukun ta argia,  
biraorikan ez duen  
hizketa garbia.



### **MUTIL KOXKOR BAT**

Mutil koxkor bat itsu aurreko  
zuela aldamenian,  
gizon buru-soil, bizar-zuri bat  
bi makuluren gainian,  
kale ertzian ikusi nuen  
inora ezin joanian;  
ta bera nor zan jakin nahiean  
inguratu nintzanean,  
limosnatxo bat eskatu zidan  
Jainkuaren izenian.

Zerbait emanaz galdetu nion  
ahal zan modu onenian,  
jaiotzetikan al zeukan hala  
gaitzak hartua mendian.  
Erantzun zidan:"Ez semia, ez,  
nik indarra nuenian,  
ez nuen uste iritsitzerik  
honetara azkenian...  
Gaur limosna bat eskatuzten det  
Jainkuaren izenian.

Eta jarraitu zuen esanaz:  
"Lehengo gerrate denian  
ni aurre xamar ibiltzen nintzan  
beti edo gehienian;  
nekatu gabe aisa igoaz  
aldapik luzenian;  
etzan burura asko etortzen  
gu hala gabiltzanean...  
gero limosna eskatuzterik  
Jainkuaren izenian.

### **ALPERRAREN ASTEA**

Astelehena jai ondoren alperra  
ezer ez egiteko ez goaz lanera  
ez goaz lanera, ez goaz lanera,  
ez goaz lanera,ez goaz lanera

Asteartea, euria goitik behera  
busti egingo gara, ta ez goaz lanera  
ez goaz lanera, ez goaz lanera,  
ez goaz lanera,ez goaz lanera

Asteazkena, osaba ezkontzen da  
ta jai hartzen badu ez goaz lanera  
ez goaz lanera, ez goaz lanera,  
ez goaz lanera,ez goaz lanera

Osteguna, amonaren eguna  
hau ospatuzteko, ez goaz lanera

Odola bero eta burua  
harrua daguanian,  
edozein eran sartutzen da bat  
halako itsumenian;  
atsekabe ta negar saminak  
badatoz ondorenian;  
nola erabat batek bizia  
utzitzen ez duenian...  
limosnatxo bat eskatu behar  
Jainkuaren izenian.

Inoiz pentsatzen nere artian  
ni jartzen naizenian,  
gaur ere asko dirala joango  
lirakenak zuzenian,  
ez luke inork sinistatuko  
zer pena ematen didan.  
Ai! horla nintzen ni ere sendo  
ta gazte nenguanian...  
gaur limosna bat eskatuzten det  
Jainkuaren izenian.

Ai! txorakeri asko egiten  
da zentzurik ez danean;  
sinista zazu ur hau pasia  
daukanaren esanian:  
hobiago da garai dan arte  
ahalegintzia lanian,  
negar eginaz ibili gabe  
gero denbora joanian...  
limosnatxo bat bildu ezinik  
Jainkuaren izenian.

**P. M. OTAÑO**

ez goaz lanera, ez goaz lanera,  
ez goaz lanera,ez goaz lanera

Ostirala hagineta mina  
aspirina hartuta bagoaz ohera  
ez goaz lanera, ez goaz lanera,  
ez goaz lanera,ez goaz lanera

Larunbata, egun erdiko lana  
egun erdiagatik, ez goaz lanera  
ez goaz lanera, ez goaz lanera,  
ez goaz lanera,ez goaz lanera

Igandea, lantegia itxita  
lan egin nahi baina ezin joan lanera.  
ez goaz lanera, ez goaz lanera,  
ez goaz lanera, ez goaz lanera



### **HAIKA MUTIL**

Haika mutil, jeiki hadi  
argia den mira hadi,  
Bai nausia, argia da  
gaur oilarra kanpoan da.

Haika mutil, jeiki hadi  
euria den mira hadi  
Bai nausia, euria da,  
gure orra bustia da.

Haika mutil, jeiki hadi  
surik baden mira hadi  
Bai nausia, sua bada  
gur'gatua beroa da

Haika mutil, jeiki hadi  
hortxet zer den mira hadi  
Bai nausia, haizea da,  
gur`leihoa ireki da

Haika mutil, jeiki hadi  
kanpoan zer den mira hadi  
Bai nausia, elurra da,  
lurra txuriz estali da

Haika mutil, jeiki hadi  
urean zer den mira hadi  
Bai nausia, ardia da  
aspaldian itoa da.

Haika mutil, jeiki hadi  
Zer oinon den mira hadi  
Bai nausia, egia da,  
mutiltxo hau unatu da.

### **GURETZAT**

Guretzat berdin dira  
astea eta jaia,  
lana bihurtzen dugu  
kantatzeko gaia.  
Har ditzagun eskuan  
giltza eta laia,  
gariz eta burdinaz  
lantzeko Bizkaia.

Gitarrarekin aire berri bat  
daramagu kantuz egun,  
abesti libre eta leiala,  
prestu eta noblezadun;  
haren medioa zer garen, ongi  
izan gaitezen ezagun,  
herri langile nekazaria

hala defendi dezagun.

Gure gogoa ez bedi arren  
kantu honekin akaba,  
gure ekintza izan dadila  
gure hitzaren alaba.  
Egun batean esan dezagun  
ez "hala biz" bai "hala da",  
nekea eta lana dirade  
zorianaren alaba.

Bide honetan baldin bagoaz,  
jakin dezagun zergatik,  
zin egin behar dugu zintzoki,  
bakoitzak duenagatik;  
sinestedunek dudarik gabe  
bere Jaungoikoagatik  
eta sineste gabeek berriz  
bere ohoreagatik.

### **FURRA FURRA**

Furra, furra, fandangoa,  
hortxe duzu fandangoa  
geure gustokoa.

Gaur goizean jeiki naiz  
suerte onean,  
tanke bat topatu dut  
neure kafesnean;  
ez dakit zer daukagun  
bake ala gerra  
bainan nik badaezpadan  
egin dut puzkerra.

Zerbait egitekotan  
zuzen eta artez  
zorri bat garbitu dut  
ur pistola batez,  
orain galdurik nago  
beldurrez beteta  
muniziorik gabe  
gelditu naiz eta.

Neure arma bakarra  
dut akordeoia,  
hauspoari eraginez  
dirudi leoia;  
eskua jaten badit  
on egin dezaion  
Cervantsei holakorik  
gertatu zitzaion.

Eta orain banao  
berriro ohera,  
bila ez badatozkit



lolo egitera;  
bihar ikusiko da  
zer dagoen berri,  
jakintsuenak ere  
ezin du igerri.

### **IHESA ZILEGI BALITZ**

Ihes betea zilegi balitz  
nunbait balego bakea  
ni ez nintzake etxe ertzeko  
loredien maitalea.

Ni ez nintzake oinazearen  
menpeko mixerablea  
oihu zekenen destinatzaile  
etsipenaren semea.

Ni ez nintzake iñorentzako  
eskandaluzko kaltea  
lur hotz batetan aldatutako  
landare sustrai gabea.

Ihes ederra zilegi balitz  
urra ahal baledi katea  
ni ez nintzake ontzi gabeko  
itsasgizon ahalgea.

### **EGUN DA SANTIMAMIÑA**

Egun da Santimamiña  
benetan egun samiña.  
Goiko zeruan gorde dezala  
luzaro neure arima

Esaten dizut egia  
hau ez da usategia;  
erroi artean izan nitzaden  
benetan ausategia.

Egun da Santi Mamiña  
benetan egun samiña.  
Goiko zeruan gorde dezala  
luzaro neure arima

Itsas aldean izarra,  
hari begira lizarra;  
euskara salbo ikusi arte  
ez dut kenduko bizarra.

Egun da Santi Mamiña  
benetan egun samiña.  
Goiko zeruan gorde dezala  
luzaro neure arima

Kantatu zuen oilarrak,  
argitzen dira belarrak;

Ageda gure martiriari  
moztu zizkaten bularrak.

Egun da Santi Mamiña  
benetan egun samiña.  
Goiko zeruan gorde dezala  
luzaro neure arima

Bularrak moztu zizkaten eta  
Euskalerrriak diotsa,  
solomu luze dultzerik gabe  
eman zaidazu bihotza.

Egun da Santi Mamiña  
benetan egun samiña.  
Goiko zeruan gorde dezala  
luzaro neure arima

Eman zaidazu bihotza eta  
ken berriz nahigabeak.  
Esan noiz garen izanen gure  
etorkizunen jabeak.

Egun da Santi Mamiña  
benetan egun samiña.  
Goiko zeruan gorde dezala  
luzaro neure arima.

### **ITURENGO AROTZA**

Iturengo arotza  
Erramun Joakin,  
haserre omen zaude,  
zeren dugun jakin.  
Santurik ez laiteke  
fiatu zurekin:  
San Kristobal urtuta,  
joariak egin.

Arotzak erran dio  
bere andreari:  
-"Urtu behar dinagu:  
ekarran Santu hori".  
- Gizona, hago ixilik!  
Bekatu duk hori".  
-"Etzionagu erranen  
sekulan inori".

Arotzak erran dio  
bere andreari:  
-"Begira zaion ongi  
joare multzuari,  
soinuan bilatu ta  
denak zeuden ongi.  
Salatu ezpagindu  
koinatak, Joana Mari"



Kobrezko Santurikan  
inun bazarete,  
egoten al zarete  
hemendik aparte;  
bertzenaz arotz hoiek  
jakiten badute,  
joariak eiteko  
urtuko zaituzte.

### **AMAK EZKONDU NINDUEN**

Amak ezkondu ninduen  
hamabost urtekin, (Bis)  
senarrak bazituen  
larogei berakin,  
eta ni, neskaita gaztea,  
agure zaharrarekin. (Bis)

Ama, zertarako dut  
nik agure zahar hori? (Bis)  
hartu ta leihotikan  
jaurti behar dut nik,  
ai ene! ene leihotikan  
jaurti behar dut nik. (Bis)

"Neska, hago isilikan,  
aberatsa dun hori, (Bis)  
pazientziz pasa hitzan  
urte bat edo bi,  
hori hilez geroztikan  
biziko haiz ongi." (Bis)

Deabruak daramala  
interesatua, (Bis)  
hau baina nahiago dut  
adin berekoa  
ai ene! hogeia bat urteko  
gazte loratua. (Bis)

### **EHUN URTE**

Ehun urtez Aupa Real!  
Beti Real!  
Ehun urtez Aupa Real!  
Beti Real!

Ehun urtez bizi izaten  
badaki maiteminak  
oso harro daramatzagu  
kolore txuri urdinak

Ehun urtez Aupa Real!  
Beti Real!  
Ehun urtez Aupa Real!  
Beti Real!

Hondartzan abiatu eta  
hasi ginen Ondarretan  
garenera iritsi gara  
Atotxa eta Anoetan

Ehun urtez Aupa Real!  
Beti Real!  
Ehun urtez Aupa Real!  
Beti Real!

Oroimenak gordetzen duen  
barren-barreneko poza  
Puertollano edo Atotxa  
El Molinon, Zaragoza

Ehun urtez Aupa Real!  
Beti Real!  
Ehun urtez Aupa Real!  
Beti Real!

Irabaztean apaldu  
galtzean galdu ongi  
harrobia hor daukagu  
balio horien harrobi...

### **IKUSTEN DUZU GOIZEAN**

Ikusten duzu goizean,  
Argia hasten denean,  
Menditto baten gainean,  
Etxe ttipitto aintzin xuri bat,  
Lau haitz handiren artean,  
Iturritto bat aldean,  
Xakur xuri bat atean,  
Han bizi naiz ni bakean

Nahiz ez den gaztelua,  
Maite dut nik sor-lekua,  
Aiten aitek hautatua.  
Etxetik kanpo zait iduritzen  
Nonbeit naizela galdua,  
Nola han bainaiz sortua,  
Han utziko dut mundua,  
Galtzen ez badut zentzua.

Etxean ditut nereak  
Akilo, haitzur, goldeak,  
Uztarri eta hedeak ;  
Jazko bihiaz ditut oraino  
Zoko guziak beteak  
Nola iragan urteak  
Ematen badu bertzeak  
Ez gaitu hilen goseak !



### **MAITIAK GALDE EGIN ZAUTAN**

Maitiak galde egin zautan polita nintzanez  
Maitiak galde egin zautan polita nintzanez  
polit, polit nintzela, baina larrua beltz, larrua  
beltz.

Maitiak galde egin zautan premu nintzanez  
Maitiak galde egin zautan premu nintzanez  
premu, premu nintzela, baina etxerik ez,  
etxerik ez.

Maitiak galde egin zautan boltsa ba nuenez  
Maitiak galde egin zautan boltsa ba nuenez  
boltsa, boltsa ba nuela, baina dirurik ez,  
dirurik ez.

Maitiak galde egin zautan lana ba nuenez  
Maitiak galde egin zautan lana ba nuenez  
lana, lana ba nuela, baina gogorik ez,  
gogorik ez.

Gaixoa hil behar dugu guk biok gosez,  
gaixoa hil behar dugu guk biok gosez,  
gosez, gosez hil behar, baina elkar maitez,  
elkar maitez.

### **MARKESAREN ALABA**

Zeruak eta lurrak egin zituena  
memoria argitzera zator neregana;  
esperantza badaukat zerorrek emana  
kunplutuko dudala desio dudana.

Amodiozko penak oraingo honetan  
publika ahal banintza bertso berrietan;  
enteratu naiz ongi enkargu horietan  
San Jose arratsaldeko hiru t/Eerdietan.

Markes baten alaba interesatua  
marineruarekin enamoratua  
deskubritu gaberik bere sekretua  
amodioa zeukan barrena sartua.

Egun seinalea zen gogoan hartzeko  
esan ziola haren etxera joateko.  
- Deseo dudana hitz hau manifestatzeko  
zurekin, Antonio, nago izateko.

- Zer esaten didazu? Juanita, hitz hori,  
tentatzen ari zarela trazak badirudi.  
Ez zait gure gradurik tokatutzen niri  
ez burlarikan egin marineruari.

- Eduki dezakezu ongi sinistua  
aspaldian nengoela zutaz gustatua.  
Ez zaitut nik utziko desanparatua  
hala egiten dizut gaur juramentua.

Konformatu ziraden elkarren artean  
ezkonduko zirela hurrengo urtean.  
Eskola ikasteko bien bitartean  
beraren herritikan guztiz apartean.

Hala disponiturik jarri ziren biak  
kartaz entenditzeko elkarren berriak.  
Formalidadea(re)kin jartzeko egiak  
baina ez ziren lo egon amaren begiak.

- Alferrik izango dira haserre gurean  
ez naute mudatuko eternidadean.  
Esposatu nahi nuke kariño onean  
Antonio Maria etortzen denean.

Ezin egon zen ama hitz hori sufritzen,  
berekala hasi zen kartak detenitzen,  
intentzio haundiagoz ezkontza galdutzen;  
Juanitak holakorik ez zuen pentsatzen.

Amaren malezia! korreora joan da  
Antonio hil zela egin zuen karta;  
Juanitaren tristura berri hura jakinda  
engainatua bestek gezur bat esanda.

Amak esaten dio: Juanita nerea  
galdu da, diotenez Antonio Maria.  
nik bilatuko dizut beste bat hobea  
maiorazko, interes askoren jabea.

- Ama ez niri esan horrelakorikan  
ez dut nik besteengana amodiorikan.  
Ezin alegre leike nere barrenikan  
komententzia ona izanagatikan.

- Utzi alde batera horrelako lanak  
ez ditut nik ikusten zu bezala damak.  
Nahi badituzu hartu onra eta famak  
giatuko zaituzteaitak eta amak.

Denbora kunpliturik galaia abian  
zer pasatu ote zen hren memorian  
kartarik hartu gabe joan den aspaldian  
inozente sartu zen jaio zen herrian.

Hau da lehendabiziko hark esan zuena.  
- Zer da musikarekin onratzen dutena?  
Markesaren alaba kalean barrena  
esposario zela hark behar zuena.



Desmaiatu egin zuen ordubete  
gero nobia eske hitz bi egin arte  
inguratu zitzaien makina bat jende  
bigarren ordurako hil zen derepente.

Gaua pasatu eta hurrengo goizean  
entierroa zuen bigarren klasean.  
Markesaren alaba guztien atzean;  
Zer pena izango zen haren bihotzean?

Penarekin lehertu Antonio hil zen  
akonpainatu zuen Juanitak elizan.  
Maitasuna bazion esan dudana gisan  
geroztikan ez zuen osasunik izan.

Erremedia baledi sentimendu hori  
bitarteko bat jarri Jesus maiteari  
orazio eginaz Birjina Amari  
zeruan gerta dadin Antonio Mari.

Elkarren konpainian guk ere nahi dugu  
Birjina egiozu Jaunari erregu  
kristau guztiogatik baldin ahal bazenu  
Iturrinok horrela desiatutzen du.

### **TXIKITIN PARIAN**

Soldadu sartu nintzan  
zortzi bat urteko,  
Errege serbiduta, txikitin parian paina,  
ai libre izateko.

Erregek ez dau behar  
gizon ezkondurik  
baizikan mutil libre, txikitin parian paina,  
ai libre-libretxorik.

Mutilik behar eta  
mutilik egon ez  
Errege silan dago, txikitin parian paina,  
ai jarrita negarrez.

Neskak badaude baina  
ez dute balio  
Erregeri begitik, txikitin parian paina,  
ai negarra dario.

Bergaran nindoiala  
Brigadearekin  
enamoratu nintzan, txikitin parian paina,  
ai damatxo batekin.

Etxezuriko dama  
ikusten badozu  
gorantziak daiola, txikitin parian paina,  
ai esango diozu.

Zeinek hori eman dizun  
galdetzen badizu  
Felix de Aranburu, txikitin parian paina,  
ai esango diozu.

Felix de Aranburu  
hain gizon trebea  
Bergaran bilatu dau, txikitin parian paina,  
ai beretzat andrea.

### **BARATZEKO PIKUAK**

Baratzeko pikuak hiru txorten ditu,  
baratzeko pikuak hiru txorten ditu  
neska mutil zaleak, neska mutil zaleak  
hankak arin ditu, hankak arin ditu, hankak  
arin ditu.

Hankak arinak eta burua arinago,  
hankak arinak eta burua arinago,  
dantzan hobeto daki, dantzan hobeto daki  
artajorran baino, artajorran baino, artajorran  
baino.

Ai ene! Nik ere nahi nuke.  
Ai ene! Zuk nahi bazenuke!  
Ai ene! Nik ere nahi nuke.  
Ai ene! Zuk nahi bazenuke!

Artajorrara noa luberri berrira,  
artajorrara noa luberri berrira,  
belarra jorratuta, belarra jorratuta  
artoa sasira, artoa sasira, artoa, sasira.

Egin dut eginahala, ezin dut gehiago,  
egin dut eginahala, ezin dut gehiago;  
astean artajorran, astean artajorran,  
nekatu nago, nekaturik nago, nekaturik  
nago.

Ai ene! Nik ere nahi nuke.  
Ai ene! Zuk nahi bazenuke!  
Ai ene! Nik ere nahi nuke.  
Ai ene! Zuk nahi bazenuke!

Aitak artajorrara aginduez gero,  
aitak artajorrara aginduez gero  
buruan min dut eta, buruan min dut eta  
soroan hotz dago, soroan hotz dago,  
soroan hotz dago.

Ama, buruan min dut, ez esan aitari!  
Ama, buruan min dut, ez esan aitari!  
Tomintxo auzokoa, Txomintxo auzokoa  
gustatzen zait niri, gustatzen zait niri,  
gustatzen zait niri.



Ai ene! Nik ere nahi nuke.  
Ai ene! Zuk nahi bazenuke!  
Ai ene! Nik ere nahi nuke.  
Ai ene! Zuk nahi bazenuke!

Gorputz egokia eta zangoa galanta,  
gorputz egokia eta zangoa galanta.  
Begira neskatxa horren dantzarako planta,  
dantzarako planta, dantzarako planta.

Ederki dantzatzen du ezkerreko hanka,  
ederki dantzatzen du ezkerreko hanka,  
dama horrek ez baitu, dama horrek ez baitu  
deusik ere falta, deusik ere falta, deusik ere  
falta.

Ai ene! Nik ere nahi nuke.  
Ai ene! Zuk nahi bazenuke!  
Ai ene! Nik ere nahi nuke.  
Ai ene! Zuk nahi bazenuke!

Oraindikan ez daukat ezkongai sobrerik,  
oraindikan ez daukat ezkongai sobrerik,  
ez aberatsik eta, ez aberatsik eta  
hain gutxi pobrerik, hain gutxi pobrerik, hain  
gutxi pobrerik.

Bihotz barnean zauzkat ondotxo gorderik,  
bihotz barnean zauzkat ondotxo gorderik;  
zurekin biziko naiz, zurekin biziko naiz  
ez badut hoberik, ez badut hoberik, ez  
badut hoberik.

Ai ene! Nik ere nahi nuke.  
Ai ene! Zuk nahi bazenuke!  
Ai ene! Nik ere nahi nuke.  
Ai ene! Zuk nahi bazenuke!

Badakit ba(d)ituzula bat eta bi ere,  
badakit ba(d)ituzula bat eta bi ere,  
esperantza galdurik, esperantza galdurik  
ez nago ni ere, ez nago ni ere, ez nago ni  
ere.

Ene ttiki pollita, anitz maite zaitut,  
ene ttiki pollita, anitz maite zaitut;  
zatoz zaldi gainera, zatoz zaldi gainera,  
eramanen zaitut, eramanen zaitut,  
eramanen zaitut.

Ai ene! Nik ere nahi nuke.  
Ai ene! Zuk nahi bazenuke!  
Ai ene! Nik ere nahi nuke.

Ai ene! Zuk nahi bazenuke!

Sagarra lore-lore denbora denean,  
sagarra lo-lore denbora denean,  
gazteak hankak arin, gazteak hankak arin  
soinua denean, soinua denean, soinua  
denean.

Baratzeko pikuak hiru txorten ditu,  
baratzeko pikuak hiru txorten ditu,  
hiru txorten hoietan, hirut txorten hoietan  
hiru mila piku, hiru mila piku, hiru mila piku.

Ai ene! Nik ere nahi nuke.  
Ai ene! Zuk nahi bazenuke!  
Ai ene! Nik ere nahi nuke.  
Ai ene! Zuk nahi bazenuke!

### **MANDO BATEN GAINEAN**

Mando baten gainean  
Domingo Kanpaña  
etzijuak hutsirik  
mando horren gaina,  
azpian dihoana  
mandua dek baina,  
gainekoa ere badek  
azpikoa haina ...  
Mando baten gainean  
bestia, alajaina!

### **XOXUAK GALDU MOKUA**

Xoxuak galdu mokua,  
mokua,  
galdu du xoxuak, gaixoak!  
Nola kanta nola xirula,  
nola kanta xoxuak?

Xoxuak galdu begia,  
begia, mokua,  
galdu du xoxuak, gaixoak!  
Nola kanta nola xirula,  
nola kanta xoxuak?

Xoxuak galdu burua,  
burua, begia, mokua,  
galdu du xoxuak, gaixoak!  
Nola kanta nola xirula,  
nola kanta xoxuak?

Xoxuak galdu lepua,  
lepua, burua, begia, mokua,  
galdu du xoxuak, gaixoak!  
Nola kanta nola xirula,  
nola kanta xoxuak?



Xoxuak galdu hegala,  
hegala,lepua, burua, begia, mokua,  
galdu du xoxuak, gaixoak!  
Nola kanta nola xirula,  
nola kanta xoxuak?

Xoxuak galdu azpia,  
azpia, hegala,lepua, burua, begia, mokua,  
galdu du xoxuak, gaixoak!  
Nola kanta nola xirula,  
nola kanta xoxuak?

Xoxuak galdu iztarra,  
iztarra, azpia, hegala,lepua,  
burua, begia, mokua,  
galdu du xoxuak, gaixoak!  
Nola kanta nola xirula,  
nola kanta xoxuak?

Xoxuak galdu buztana,  
buztana, iztarra, azpia, hegala,lepua,  
burua, begia, mokua,  
galdu du xoxuak, gaixoak!  
Nola kanta nola xirula,  
nola kanta xoxuak?